

dem andern zugee. Sie sol In auch also damit überantwurten all brief vnd Register, die über die obgenannt Herschafft lauten, als das die obgenanten brief, die vnotelt sind, aufweisen, vnd damit sôlh entflachbrief, an all Vögt, phleger, Richter, Burger der vrogenanten Geslösser, herschefft, lannde, vnd lëut, an die, daran des zu sôlher überantwurtung, vnd entflahung notturfft ist, vnd mit denselben Vögten, Phlegern, Richtern, Amblëuten, Burgern, vnd lëuten, die darin gehörn, schaffen, daz Si nu hinfur vnserm vrogenanten Herren von Österreich, vnd seinen Erben gehorsam sein, vnd Si Irer Ayd damit Si Ir yecz verpunden sind, ledig darauf sagen, in der mass, vnd form, als darzugehört, So ist geredt von des hawss wegen, vnd des Stadls ze Veltkirchen, die der von Tokchemburg gekauft, vnd gepawt hat, die sullen vnserm Herrn von Österreich beleiben, Was dann der Heurigen Nücz, Zinns, vnd gült sind, es sein wein, getraid, Phenning, oder Welherlay das sey, die sullen halb, vnserm Herren von Österreich, vnd halb der von Tokchenburg geuallen, Aber all Zöll, vnd Mûln sullen für sich nach sôlhen überantwurten, vnserm Herrn von Österreich wartten, vnd sol die von Tokchemburg keinen tail darinn haben, Was auch der von Tokchemburg lehen, in den obgenanten Herschefften verlihen hiet, es wër geistlich, oder weltlich, dabey sol es beleiben, doch yedsmanns Rechten darinn vorbehalten, alles angeuërd. Vnd zu vrkund diser Taidung, vnd Sach, haben der Erwidig, Abbt Niçlas von Sand Jörgenberg, (im untern Innthal) sein Insigl, vnd der obgenant von Mëtsch sein Betschadt, von baidertail geuallens, vnd bet wegen gedrukht auf dise Zedl, der yeglichem tail aine ist, geantwurt, in gleicher lautt, bei disen Taidingen sind gewesen, die yeczgenanten Abbt Niçlas, vnd Vogt Vlreich von Mëtsch, Wolf von Brannedes, her Geörg Tumbrobbst ze Brichtsen, Hanns Wilhelm von Mûlinen genant Drüksëss, Burkhart von Burnkilch, Andre Rauch, Albrecht Vaystl, des von Brannedes Dyener. Das ist beschehen, vnd die Taiding sind gemacht ze Telffs im Intal, an Mitichen vor sand Matheus tag, des heiligen Ewangelisten. Anno Dominj zc. Tricesimo sexto.

L. S. . L. S.
impress. impress.